

Doctrinaeque decus debet natura puellae?
 Scandis Apollineos colles virguncula, prisca,
 Excidimus iam laude viri, vilescimus ultra,
 Foeminaque ingenio nostros transcendis honores,
 Mirabor magis? an rerum portenta dolebo?
 Num dicam peccasse Iouem? vel mascula miris
 Inuerti simulacra modis? Sempronia nobis
 Altera, et Arctoo melior sub sidere Sappho
 Nascitur, atque nouam protrudit Pallada terris
 Iuppiter et veteres mulier scrutatur Athenas.
 Non Latium, non Roma satis, non sufficit vno
 Ore loqui, minor est simplex facundia votis
 Virginis. Argolicas etiam (proh numina) voces
 Anna legit sociatque suam cum Cecrope Belgam.
 Si mirum antiquae committi scripta Corinnae,
 Haec etiam, quod scribat, habet, si conscia rerum
 Prodidit exactis Manto sua carmina seclis,
 Egregiumque aliquid grandes cecinere Sibyllae,
 Et Mariae mens ista potest. sociata marito
 Polla fuit, iuuitque sui commenta poëtae.
 Nec minus illa virum studiis succurrere posset,
 In socios admissa thoros, quid Belgica iactas
 Belligerasque rates, et magno Principe fultas
 Imperii crescentis opes? quid didita fama
 Praelia? Barbaricis oneratas mercibus alnos,
 Totque nouis passim laxatas moenibus vrbes?
 Hic maiora stupe, rarum Battavia nomen
 Conficit vna tibi, praestat facunda virago
 Tot titulis, fastusque leues virtutibus anteit,
 Nec precum iam sexus habet, cum virgine, docti,
 Communes animos geritis, utilissima nostri

Portio